

DE NATURA EXTENSIONIS  
**DISSERTATIO**

EMINENTISSIMO, ET REVERENDISSIMO PRINCIPI

S. R. E. CARDINALI

**FRANCISCO BURGHECIO**

**EPISCOPO ALBANENSI**

*Nuncupata, & publice propugnata*

**THEMATE CUM NEMINE COMMUNICATO**

**A PASCHALI DE PETRA SULMONENSI**

In Collegio Novo Calasancio Scholarum Piarum Convidore,  
& Philosophiæ, ac Matheseos Auditore.

**ACCEDUNT PROPOSITIONES SELECTÆ**

**EX ANALYSI INFINITESIMORUM**

*Ab eodem construenda, ac demonstranda.*



**ROMÆ MDCCLV.**

Ex Typographia Joannis Zempel apud Montem Jordanum.

---

**SUPERIORUM PERMISSU.**

THE JOURNAL OF THE AMERICAN MEDICAL ASSOCIATION

PUBLISHED WEEKLY  
535 N. Dearborn Ave. Chicago, Ill., U.S.A.  
Subscription Price, \$5.00 per Annum in Advance



*Era illa Laus , EMINENTISSIME  
PRINCEPS , & quavis alia ma-  
jor , quam cumulatissime consequuntur ,  
qui scientias in sinu veluti suo excipiunt ,*

A 2


pa-

*patrocinio peramanter fovent , præmiis ,  
 & honoribus illustrant , tota ad eos dun-  
 taxat pertinet , qui nobilitate generis , di-  
 gnitate , virtute , sapientia præ cæteris emi-  
 cant . Neque tamen disputationi huic meæ  
 TE summum adesse Præsidem exoptavi ,  
 atque ad TE enixè rogandum supplex eo  
 adveni consilio , ut Nomini Gentique Tue  
 spectatissimæ hoc genus laudis accedat ;  
 cum illud plenissime sciam , quod ignorari  
 sane a nemine patitur BURGHEsii nomi-  
 nis celebritas immortalis , claritas Gene-  
 ris Tui , & tuarum rerum omnium ma-  
 gnitudo ; Tuum nimirum , tuorumque  
 splendorem augeri , gloriamque non pos-  
 se amplius nova laudis accessione grande-  
 scere . Ut enim jam aliud quodcumque  
 ornamentum , decorisque genus , ita illud  
 etiam præstantissimum , atque inter cæ-  
 tera pulcherrimum in Tua semper efflo-  
 ruit Familia , quod sapientiæ , ac sapien-  
 tum*

tum amatores , adiutores , fautores ju-  
re optimo consequuntur . Neque vero suc-  
censere mihi cuipiam fas est , quod hoc  
duntaxat suspiciam , admirer , quoniam  
BURGHESIANAS res ita esse comparatas  
ignorare non potest , ut earum quæli-  
bet amplissimum non rudis quidem hujus  
meæ , sed politioris cujuscunque oratio-  
nis argumentum sit ; si tamen ullius elo-  
quentiæ tanta vis est , ut vel unam  
solum , qua par est , ratione possit exor-  
nare . PAULUM V. PONTIFICEM MA-  
XIMUM immortalis dignissimum memoriæ  
innumera , ac præclarissima sui in litte-  
ras , ac litteratos homines amoris dedis-  
se specimina , eas extulisse splendidissimis  
honoribus , hos præmiis magnificentissi-  
me cumulasse , quotus quisque est pere-  
grinus adeo , & hospes , qui nesciat ? Il-  
lud unum mihi dixisse sufficiat , quod ad  
nos ipsos omni jure pertinet : B. JOSE-  
PHUM

PHUM CALASANTII Schol. Piar. Sodalitii Fundatorem, illum nempe non sanctissimum modo, sed sapientissimum etiam virum, qui totum se pietati, literisque instaurandis devoverat, ea benignitate complectebatur, eoque prosequabatur amore, ut publicis sæpè significationibus maximisque beneficiis suam erga illam voluntatem confirmaverit; tanti fecit, ut ad hanc etiam Tuam Regiæ parem dignitatem evehere meditaretur. Cum sane illud usuvenire sciam, ut qua in familia laus aliqua floruerit, eam, qui sunt ejus stirpis, cupidissimè persequantur, ad Te CARDINALIS AMPLISSIME, confidentissimè accessi, quo Te patrono, atque auspice in hoc studiorum meorum periculo utens erigerer, minime dubitans quin a majoribus tuis recedens, me, resque meas Philosophicas, ac Mathematicas humanissime exciperes. Verum  
quid

*quid a Te sperare non licebat , qui tot  
beneficiis , & clementiæ argumentis jam  
Patrem meum devinxisti , ut suum Te  
verbis , & re defensorem , ac Patrem a Te  
revertens , & beneficia Tua recolens sin-  
gularia sæpenumero appellaverit?*



**IMPRIMATUR,**

**Si videbitur Reverendissimo Patri Magistro Sacri Palatii Apostolici.**

*F. M. de Rubeis Patriarch. Constantinop. Vicefg.*

---

**IMPRIMATUR.**

**Fr. Vincentius Elena Mag. Socius Reverendissimi P. Magistri  
Sacri Palatii Apostolici Ord. Prædicatorum.**

**De**





## *De Natura extensionis*

### DISSERTATIO.

1. **N**OVUM argumentum , quod satis amplæ molis volumen exposceret , breviter tantum hic attingimus . Quia extensionem contemplatur antiquissima Geometria , confidenter nimis hoc argumentum appellari novum videbitur , & ejusmodi non esse , ut in eo pertractando , & illustrando adhuc opera locari debeat . Sed hæc ipsa exceptio ex confusa realis extensionis idea oriens , per quam ab imaginaria mathematicorum extensione non distinguitur , ut par est , in proposito nos confirmat .

2. Duo potissimum investigabimus : vera scilicet extensionis principia , seu elementa ; & verum unionis modum . Atque in hac quidem inquisitione offendemus , quæ cum gravissimis philosophiæ rebus ætissimum habent nexum , & in re plane necessaria studium nostrum impensum esse demonstrant .

3. Simplicia Leibnitianorum elementa omnium maxime arident , & propterea hic ea stabiliam , & ab omnibus , quibus eadem vexant , iæctibus nostri præsertim ævi philosophi tueri eni-

B

tar .

tar. Priusquam vero proponam notissimam illorum demonstrationem, in simplicium idea, & proprietatibus paulisper immorabor, & paulisper etiam in ostendendo rationis sufficientis principium, cui demonstratio illa innititur, utique posse esse usui ad quidpiam utcumque determinandum, & demonstrandum.

4. Quæ partibus caret substantia, ea simplex audit. De possibili simplicium existentia dubitare non possumus, quia nullam possumus invenire in allata definitione repugnantiam. Substantia est subiectum primum, quod subest ceteris, quæ rei insunt, seu quod affectiones rei omnes quodammodo sustinet. Hæc substantiæ idea partes non excludit necessario, nec necessario includit: Dantur nimirum affectiones, quæ in subiecto, cui inest, partes requirunt, & aliæ, quæ easdem respuunt. Actum est de simplicitate animæ, nisi id admittas, de ejus immortalitate &c. Sed existentia animarum, aliorumque spirituum omnem adimit dubitandi de simplicium substantiarum possibilitate occasionem.

5. Ex negativa hac simplicium definitione facile eruuntur plurimæ eorundem proprietates negativæ, quæ cum passim apud Leibnitianos prostant, hic merito prætermittuntur, ut positivis aliis, aut minus notis, aut etiam nunc primum demonstratis locus relinquatur. Notæ simplicis omnes sunt una eademque nota, una eademque affectio, seu determinatio, atque per hanc identitatem simplex menti exhibetur in conceptu positivo, per hanc identitatem positive a composito discriminatur. Simplicis affectiones diversis licet nominibus expositæ sunt una affectio diversa, admittens nomina pro diversis relationibus ad alia; & id, cujus affectiones nonnisi per relationes differunt, reapse autem omnem respuunt differentiam, id cujus affectiones sunt una dumtaxat affectio, simplex est. Una simplicis affectio est omnes ejusdem affectiones, una involvit, includit omnes; una posita ponuntur omnes, una omnes determinat.

6. Composita substantia partes habet reales, adeoque omnino determinatas, & pro partium diversitate non possunt earum determinationes, atque affectiones non esse diversæ. Quamobrem illa

illa identitas affectionum est verum criterium, quo a composito discernitur simplex, & cum ens omne aut simplex sit, aut compositum, illud ipsum criterium ab omni ente simplex discernit.

7. Propositi criterii demonstratio facile petitur ex hoc ipso, quod dari debet nota aliqua, per quam simplex a composito dignoscatur. Totius compositi affectio quævis est collectio plurium diversarum affectionum, quia ipsum constat pluribus diversis partibus, quæ non eodem modo possunt determinari, non easdem possunt habere affectiones. Simplicis vero ratio contraria est; partibus caret, diversæ diversarum partium determinationes in eo nequeunt concipi, quod in eo afficitur, & determinatur, id unum est, & idem; & unum & idem nequit simul diversis modis determinari.

8. Hæc affectio in simplicibus per essentiam unica in earum vi activa locanda est ex Leibnitianorum mente, quorum conatus ad id ostendendum non æque felices sunt. Validiores ipsorum rationes afferam tum eas nimirum, quæ apud ipsos expresse occurrunt, tum alias, quæ res ipsorum penitus perscrutanti se objiciunt. In primis ergo simplicibus vis minime denegabitur, si animus ad ea convertatur, quæ Malebranchii substantiis finitis vim omnem adimentis sententiam satis feliciter expugnarunt. Hæc nimirum efficiunt, quidquid substantia est, quidquid propriam habet existentiam, illud aliquam vim necessario exercere, illud suis actionibus suæ existentiae specimina necessario exhibere. Elementorum essentialis discernibilitas argumentum quoque est, quo vim ipsis tribuendam esse sibi videntur ostendere Leibnitiani: Ad idem evincendum petunt etiam argumentum a necessitate edendi specimina suæ existentiae, cui omnes substantiæ subsunt. Rationis denique sufficientis principio substantiis omnibus inertiae vim, quæ positive activa sit, non mera passivitas, seu mera capacitas suscipiendi mutationes ab aliis inductas, conficiunt. Cui quidem rationi suis favet natura mutationibus, & phenomenis, itaut instar axiomatis assumptum sit a Newtono actioni cui libet æqualem respondere reactionem, quia id elucet a posteriori

ri in exemplis, quorum aliqua ipse recenset. Inertiam profecto vim activam non dicimus, nisi quia reactio ipsi necessario est tribuenda.

9. Satis validis hisce rationibus lubet unam superadde-  
re; quæ ex impenetrabilitate substantiis ex essentia non denegan-  
da earum vim activam inferet. Ut autem ea firmitus, & vali-  
dius ostendatur omnem substantiam impenetrabilem esse prius  
ita evincam ex entis simplicis, & compositi notione communi-  
ter recepta. Simplex est, quod partibus caret, compositum,  
quod partibus extra se invicem existentibus constat. Sint jam  
substantiæ simplices A & B, quas compenetrari fingamus; & per  
compenetrationem efficiant ens C. Aut C compositum ens est,  
aut simplex. Si prius assumas; admittes in C partes A & B ex-  
traexistentes, adeoque se vere non compenetrantes; si secundum  
tibi magis arrideat, cum simplex unum majorem habere nequeat  
realitatem, quam alterum, vel altero majus esse non possit,  
tanta erit realitas in C, quanta erat in A, vel in B, adeoque  
alterutrius realitatem in compenetratione periisse opus erit; Quod  
cum fieri non possit, nec substantias A & B simplices compene-  
trari ullo modo posse manifestissimum est.

10. Si notio existentiæ rite determinetur, exurget  
inde argumentum non minoris roboris, quam mox allatum. Di-  
co itaque ens A extra ens B necessario existere, si in ipsis den-  
tur aliquæ oppositæ, & inter se repugnantes determinationes. Si  
enim ponas A existere in B, necesse erit, ut fatearis in B simul  
esse opposita, & repugnantia, quod non patitur ipsum, quod  
repugantiæ appellatur principium. Hujus notiois veritas clarius  
elucescit, si attendatur ad vim, quam habent voces oppositæ  
*includere, involvere, continere &c.* Quibus intra existentiam, ut  
ita dicam, exponimus. Involvi in alio, alteri inesse, in alio  
containeri aliquid dicimus, ubi unum ex alio deduci potest. Ut  
autem unum ex alio deduci, & consequi possit, logices regulæ  
postulant, ut aliquid sit ipsis commune, seu in ipsis idem sit.  
Essentia involvit attributa, causa continet effectum, quia essen-  
tia, & attributum ita inter se comparata sunt, ut hoc ex illa  
de-

deduci possit, idque ex eo sit, quod hoc, & illa aliquid habeant commune; idemque dicendum de causa, & effectu, atque de ijs omnibus, quorum unum in alio contineri, involvi, includi dicimus. Si igitur intra existentia requirit, ut res, de quibus ipsa enunciatur, aliquas habeant determinationes communes, conformes, easdem, opus omnino est extra existentiam illud exigere, ut res, quibus ea tribuitur, vel potius in quibus ea effingitur, aliquas habeant difformes, & oppositas determinationes.

11. Jam vero duæ individua, seu numero distincta substantia oppositas necessario determinationes præferunt, nec fieri omnino potest, ut saltim aliqua unius affectio non alicui alterius affectioni opponatur; quod liquido fuit ex individui notione. Individua nimirum substantia, seu numeris omnibus determinata, quo perfecte distinguatur ab aliis, quædam habere debet propria, & aliis minime communicabilia, quæ nimirum ita sint talia in hac, ut in alia substantia eadem esse non possint. Ex quo sane illud existit individuum quamlibet substantiam necessario extra aliam existere, ab alia compenetrari non posse. Quod si excipias illas affectiones, quæ esse non possunt eadem in substantiis individuis, non esse necessarias, quamvis id admittam, respectu substantia in communi, contendo nihilominus a substantia numerice spectata abesse non posse illas ipsas affectiones accidentales, ita ut iis sublati existentia substantia designat. Propterea non metuo, ne compenetratio fieri possit, quia ab una substantia auferri potest affectio illa accidentalis, & contraria affectioni alterius, vi cujus se mutuo ambæ excludunt. Si enim id præstet compenetratio, alterutri substantia existentiam adimet, & vere compenetratio non erit. Neque ideo Christum Dominum Coenaculum januis clausis insigni miraculo penetrasse, & penetrare potuisse negamus. Quomodo enim id potuerit fieri salva tum miraculi, & Divina Omnipotentia, tum sententia nostra ratione ostendi, & explicari posse contendimus.

12. Impenetrabilitas positivas inter substantia affectiones non ægre recensetur, si attente considerentur rationes, quibus eam demonstravimus substantiis necessario esse tribuendam.

Eam

Eam scilicet substantiæ sibi vindicant omnes, quia quælibet ipsarum habet affectiones, & determinationes sibi omnino proprias, & aliis incommunicabiles; quæ quidem ratio non solum positiva est, sed includit quiddam positivi, & realis ad substantiam pertinet. Quamdiu enim in substantia concipienda nondum attingis ea, quæ ipsius propria sunt, & aliis non communia, nondum eam tibi exhibes omnino determinatam, existentem, realem; adeo illis affectionibus substantiæ propriis constituitur ejus tota realitas. Quoniam vero id, quod determinatur ejusdem esse debet conditionis, cujus est ratio determinans, impenetrabilitas profecto ad positivas substantiæ affectiones referri debet.

13. Ex impenetrabilitate id necessario efficitur, ut in substantiarum conflictu mutatio aliqua eas subeat. Incurrat enim substantia A in substantiam B: ubi ad hanc devenerit, iter suum libere non prosequetur amplius, siquidem eam non penetrabit; & impenetrabilitas erit positivum obstaculum, quoposito positiva etiam in A poni mutatio debebit, ne positivam rationem determinantem ponamus, quin determinatum simul etiam ponamus. Multo magis in B ponetur aliqua mutatio, cum ex hypotesi A ad B se conferat, & impenetrabilitate præditum, & affectum ea positiva determinatione, ex qua ipsum petere intelligitur, adeoque ubi ad B devenerit, ponetur ratio determinans B ad statum mutandum, quæ antea non aderat. In ipso igitur incurso A in B tum in A tum in B ponentur mutationes, quæ sublata impenetrabilitate non ponerentur.

14. Cum vis sit potentia accurate apta, ac determinata adtribuendam existentiam rebus, quæ eidem subsunt, nomen vis impenetrabilitati nemine invito applicabimus, siquidem existentia mutationum in conflictu substantiarum ex earum impenetrabilitate necessario ponitur, nec ut ea ponatur præter impenetrabilitatem alio quopiam opus est, sed ipsa sufficit, ipsa accurata est earum ratio expeditissima, & omnimode semper determinata. Ita nimirum impossibile est in quocumque substantiarum conflictu non poni in iis mutationes, ut repugnat ab iis impenetrabilitatem abesse. Hæc facile dabit, qui num. 13. serio perpendet.

15. Cum

15. Cum vero affectio una simplicis substantiæ ceteras involvat, erit ergo impenetrabilitas ipsa etiam inertia, gravitas, & vis quælibet alia elementaris, & diversa nomina diversas ejusdem vis functiones, non diversas vires exponent; & referentur ad diversas determinationes unius, & ejusdem vis potius quam ad plures vires. Ne de nobis Newtoniani conquerantur unica vi locum dantibus in substantiis, eamque attractionis nomine, non insignientibus observo hic sermonem nobis esse de viribus elementaribus, ex quibus simul in corpore conjunctis exurgunt vires corporis ipsius itaut vis etiam corporum uno modo determinata sit gravitas vel attractio, alio modo determinata sit inertia, alio sit soliditas &c.

16. Quoniam autem diversas exercere functiones vis ista potest, non datur ratio cur unam potius, quam aliam exerceat, adeoque ut unam exerceat, ad eam est determinanda, & ab extrinsecis causis hujusmodi determinatio debet proficisci. Hæc autem dependentia mere negativa est. Ita enim causæ externæ se habent ad illam determinationem, ut eam non producant, sed potius sint ratio, cur producat a vi, quam eadem afficit. Vis nimirum unius substantiæ in alia nequit mutationes producere, quia non potest in aliam transire, & deferere suum subjectum, cui per essentiam inest. Actio itaque sic explicanda est. Agens utique inducit mutationem in id, quod patitur, sed vis agentis positiva est causa mutationis suæ, at negativa mutationis in patiente. Agat A in B. B vero occupetur v. g. in comprimendo subjecto plano. (assumo in B unam determinationem, quia licet innumeris modis sit determinabile, uno tamen modo debet semper esse determinatum; alias non esset reale) Duplex habetur mutatio alia in A, alia in B; ad quas eodem se non habet modo vis A, sed ad suam positive, & negative ad aliam; suam producit, removetque ea, per quæ alia a vi B non producebatur. Cum nempe vis B pluribus simul non possit determinari modis, determinatio una impedit quominus in B habeatur alia, atque ita A auferens hanc determinationem illud aufert, quod ne alia haberetur, præpediebat. Accedenti nempe A ad B impene-

penetrabilitas ipsius B per essentiam se opponit, atque eo ipso pristinam relinquit determinationem. Ex hac oppositione oritur conflictus; ex conflictu mutatio in A & in B. Mutationis B duplex est ratio, nempe adventus A, & vis B indoles, & natura; per hanc B se convertit contra A, eo ipso pristinam deserit determinationem, novam producit; quam ceteroquin non produceret. si A non advenisset. Quoniam porro vis B opponitur ipsi A, uti vis A opponitur B, & reactio B in A est actio, etiam mutatio A post conflictum duplicem agnoscit rationem alteram, & quidem negativam in B, alteram vero positivam in A.

17. Hinc quamvis apparenter causa obtruncans filum, quo lapis suspenditur, diverso modo ad ipsius motum se habere videatur, ac corpus impellens ad motum corporis impulsu, reapse tamen utraque causa motum determinat removendo impedimenta, minime motum efficiendo. Hinc etiam quies idea mere negativa menti exhiberi non debet per meram motus privationem: siquidem, quævis mutatio oriens ex conflictu sive motus illa sit, sive quies est positivus effectus vis motricis ejus substantiæ, in qua contingit. Atque adeo illa quietis idea, quæ solam privationis motus ideam exhibet, imaginaria est. Imo infra constabit absoluti motus privationem quietis characterem esse non posse.

18. Quid? Eademne ergo vis & lapidem sursum projectum sursum elevabit, & sibi permissum deorsum trudet? Erit ne ergo gravitas etiam vis, per quam corpora ascendunt? Ita; sed diverso modo a causis extrinsecis determinata; & propter diversas determinationes diversis appellata nominibus; quemadmodum una eademque vis animæ repræsentativa pro diversis, quibus fungitur, muneribus modo intellectus, modo memoria, modo voluntas, modo alio nomine nuncupatur. Sed lex illa perseverantiæ in statu quietis vel motus qua ratione non lædetur; si mutationes ab extrinsecis non adveniunt causis, ut illa postulat, sed ab interno principio procedunt? Et leges illas Dinamicæ, quæ jubent motum ex una massa in aliam transferri motum unius corporis per plura distribui, quis in hac hypothese tuebitur? At at nos etiam externæ causæ actionem ad transitum de quiete



quiete ad motum ; aut de motu ad quietem , de una directione ad aliam , de uno ad alium velocitatis gradum necessariam esse contendimus , negamus solum externæ causæ actionem positivam esse , ac efficientem harum mutationum causam . Imovero etiam huic legi melius consulimus , quam Newtoniani , qui ore tenus eam amplectuntur , sed reapse respuunt . Vi siquidem ejus legis necessaria est externa actio ad illas mutationes , sed non determinatur modus , quo ab actione externa pendent ; quapropter eam non lædimus actionem externam necessariam prædicantes , sive hunc , sive alium , quo ea se ad eas mutationes habet , modum statuentes . At illi philosophi ipsam externæ causæ necessitatem auferunt duplici ratione : quia scilicet rationis sufficientis principium mutilant ; & quia vacuis mundi series abrumpunt intervallis . Lex quippe illa ex rationis sufficientis principio consequitur , & abstractis determinationibus eam limitantibus in principium rationis sufficientis evadit . Substituere rei mobili rem finitam , h. e. mutationibus quibuscumque obnoxiam ; motui vero mutationem in genere , & externæ tandem causæ rationem sufficientem , & lex illa in rationis sufficientis principium evadet . Admissis autem vacuis intervallis quæ tandem agnoscent actionis externæ necessitatem , si eo ipso demunt ejusdem possibilitatem , & causas ipsas externas , quæ hujusmodi actiones , ut mutationes ponantur , necessarias elicerent .

19. Adhuc minus recte huic naturæ legi consulit vir celeberrimus , qui vim inertiae , cui lex illa innititur , demonstrari posse negat , cum ex observationibus , tum ex rationibus metaphysicis ; quod si ea admittatur , talem ei sensum tribuit , qui non illam modo legem , sed inertiae quoque indolem , atque naturam pervertit . Vult nempe per inertiae vim non æquabilis potius motus statum , quam alterius cujusvis conservari , vel acquiri , si causæ externæ cessent . Nos vero & ejus demonstrationem a ratione sufficiente petitam pluris habemus , quam ea , quæ in eandem intorquet vir Cl. ; & aliis adhuc ex principiis eam invictissime sic evincimus . Vim substantiarum materialium a vi spiritualium in eo differre jam ostendimus , quod hæc se ipsam determinare possit , & externo non indigeat principio ad suum statum immutandum ; illa vero nequeat determi-

C

nare

nare se ipsam. Quod si enim per essentiam differt spiritus a materia, & substantiarum omnium sive materialium, sive spiritualium essentiam constituit vis, ab agendi modo discrimen illud necessarium petere solum debemus. Sed intimo sensu scimus eam esse vis animæ naturam, ut ad agendum ipsa se determinare possit. Ergo vis materialium substantiarum ejusmodi nequit esse, ut ipsa se queat determinare. Itaque eæ sunt res materiales, ut statum suum quemlibet tueantur, ex se ipsis non mutant, ad eum deferendum, & novum subeundum externa determinante causa opus habeant. Inertia est affectio illa, per quam statum pristinum tuentur res. Ergo &c. Sed frustra vis inertiae existentiam argumentis confirmarem; nisi ea etiam, quibus ejus notio mihi videtur perverti, evertere conarer. Perseverantia in aliquo statu, ait 1. per aliquod tempus non debet necessario trahere perseverantiam per reliquum tempus omne, quod sequitur; 2. Ut æquabilitas motus est quidam status corporis, ita incrementum, vel decrementum motus factum data quacumque lege est pariter quidam status. Primum quidem infirmum satis est; siquidem perseverantia unius status tempore præcedenti a nemine dicitur trahere perseverantiam ejusdem tempore subsequenti, & ejus ratio esse, nisi in infinitum, vitiosumque circulum velit incidere. Vera ratio perseverantiæ in dato statu non est anterior perseverantia in illo, sed perseverantia naturæ, & indolis rerum materialium in rebus ipsis, hoc est illa rerum materialium conditio, qua ex se ipsis nunquam possunt deferere præsentem, & novam suscipere determinationem. Satis infirmum quoque sentendum ut pote falsæ status ideæ innixum. Status enim est complexus variabilium, quæ dato momento rei insunt: Motus æquabilitas seriem statuum complectitur, per eam variabilis anterior velocitas cum posteriore comparatur, & comparatione ejusmodi, ut eadem perseverare dicatur, si mavis, æquabilitas est status cujusdam partialis perduratio. Similiter incrementum, vel decrementum quacumque lege susceptum duos involvit status inter se relatos, seu est transitus de una variabili celeritate in aliam; atque ita si inertiae tribuatur conservatio

vatio æquabilitatis, vel accelerationis, aut retardationis, ei tribuetur conservatio conservationis, vel conservatio mutationis status.

20. Et ad inertiam, & ad illam legem labefactandam contra rectam lineam se convertit vir. cel. Vult ergo minus eam esse simplicem, quam composita quantumvis curva sit, quia infinitum menti humanæ impervium ejus idea includit, minime vero curvæ plurimæ, uti circulus, ellipsis aliæque, quæ spatium finitum includunt, & oculis ipsis, ne dum menti, totæ subiiciuntur. Sed quamvis genericam rectæ definitionem terminos non includere lubentissime concedam, atque propterea rectam genericè consideratam esse infinitam, seu sine terminis non quidem vi constructionis, & ideæ, quam ipse proponit, quamque nos in notis analyseos infinitesimorum rejecimus, sed vi regularum Logices, ejusdem tamen determinatam notionem, ac individuum ita esse comparatam pernego. Cum enim ad omnimodam rei cujuslibet determinationem determinari debeant omnes notæ eam constituentes, sane datæ individuæ, realisque rectæ ideam non assequeris nisi statuto termino, quem deserit, & eo, quem petit punctum fluens; seu nisi determinatis simplicibus eam componentibus. Quid? est ne minus infinitus circulus genericè consideratus? Est ipse ita conceptus curva genita a recta circummotâ circa terminum sui immotum. Quamdiu circulum in genere concipis, haud certe potes determinare illius rectæ longitudinem; adeoque nec ullos terminos in ejusmodi notione comprehendis. Simili pacto evincam nullos admitti posse terminos in ceteris curvis quibuscunque, si ita concipiantur. At numne curvas, & rectam idcirco dicemus infinitas etiam reales, & individuas, quia earum generica notio a terminis præscindit? Ceterum illud etiam inficiari merito possum genericam notionem rectæ terminos excludere: quamvis enim eos non determinet, eos tamen non respuit, sed ut variis modis determinabiles considerat. Itaque rectæ compositio ex infiniti idea involuta tota mentalis est, non vera. Ceterum si linea recta in se ipsa spectetur, & ejus conceptui non admisceantur relationes, si modus, quo ea generatur, solum

attendatur, ejus idea erit simplicissima in complicatissimam evasura, si omnia, quæ in diversis respectibus eidem convenire possunt in eam congeramus. Sed ita fiet ut ejus adequata cognitio sit complexa, & complicata, non vero ipsa recta. His vim addit, quod ipse vir doctiss. fatetur eam esse mentis conditionem, ut longe facilius rectæ, quam curvarum ideam efformet; quamvis ex ejus mente ita se res non habeat, ubi in intima Mathematicos arcana irrumpimus. Hinc merito per ipsum cum recta ceteræ curvæ comparantur in Mathesi, & in rectas resolvuntur. Sed dum asserit usurpari quidem pro rectulis curvarum arcus minimos, & non esse, argumentum nobis exhibet asserendi illam notionem lineæ rectæ, quam ipse efformat, usurpari quidem aliquando posse v. g. in comparandis inter se locis Geometricis, & in attributis linearum communibus demonstrandis, sed non esse veram; siquidem illa oritur inde, quod finita recta pro infiniti circuli chorda habeatur.

21. Rectæ lineæ simplicitate vindicata jam licet nobis liberime asserere sublati extrinsecis determinationibus motum esse debere rectilineum communiter receptæ simplicitati naturæ in agendo innixis; atque hinc lex naturæ, de qua hic disputamus, illæsa a nobis servatur etiam quoad illud, quod exigit etiam nimirum corpora in motu posita directionem non mutare, nisi ab externis causis ad id compulsa. Id ipsum ostendimus etiam hoc pacto. Cum directio inter variables motus affectiones locum habeat, ea ad statum corporis moti referri debet. Itaque inertia, per quam corpus manet in suo statu, nec potest se ad alium determinare, postulat ut, quamdiu extrinseca id sinant, corpus eandem in motu directionem conservet, ac proinde ut per rectam moveri pergat. Hinc ipsam rationem velocitati, & ceteris motus variabilibus affectionibus applicare potes. Neque vero illud reformido, ne motui per rectam lineam desit via adhuc percurrenda, quia rectæ reales terminos necessario habent, & ne motus per eam continuari non possit; Nam & idea spatii ideæ motus extranea est, ut infra patebit, & spatium, cujus idea adnectitur ideæ motus a motu pendet, terminaturque, non terminatur motus a spatio, & spatium distinctum a coexistentium ordine

dine chimæra est, quæ motui obstare nequit, & spatium demum quatenus ad motum refertur a mechanicis est spatium imaginarium nullos agnoscens terminos. Non idcirco tamen assero motum rectilineum esse debere infinitum, sed nego solum ejus infinitudini obstare terminos in reali recta necessarios. Imo quemadmodum recta, quæ a sua idea excludit terminos, nonnisi imaginaria est, ita imaginarium etiam dico motum infinitum rectilineum. Si in corpus fiat quævis impressio, & externæ causæ nullæ sint, quæ illi opponantur, corpus illud perpetuo movebitur eadem directione, ex quo exurgit idea motus rectilinei, & recta infinitæ; sed & is motus, & ea recta non plus realitatis habet, quam illa hypothesis. Si quævis alia fingatur hypothesis, quæ motum rectilineum infinitum exposulet, haud pertimescas, ne finitudo rectæ obstat; erit enim necessario imaginaria illa hypothesis, & ille motus, imaginaria illa recta, quam ad eum referes; si quidem non ista motum determinat, sed a motu determinatur; idea autem rectæ imaginaria terminos minime includit. Nec etiam reformido ne iis me adnumeret vir cl., qui censent idcirco pertangentem abiturum corpus a vi centripeta solutum, quod recta linea sit continuatio arcus curvilinei infiniti; cum alio ex principio rem hanc deduxerim. Idcirco nempe abiturum esset per rectum, quia directionem eandem conservaturum; cum autem rectam esse tangentem subinde demonstratur sumpta quavis tangentis definitione, cum ea scilicet, quæ communis est, & ad unicum curvæ punctum refertur, tum ea, quæ ab Hospitalio proponitur: Non vero abiret per aliquam ex curvis osculatricibus inter tangentem, & curvam datam, quia id non exigit directionis conservatio, siquidem in curva qualibet ea perpetuo mutatur: Dumque saltum quemdam in eo fieri asseritur, quod corpus in orbem actum cessante vi centripeta, per tangentem abiret infinitas transgrediens osculatrices curvas inter orbem, & tangentem rectam, confusa continuitatis notio adhibetur. Verus saltus continuitatem abruptens habetur, quando status, qui transilitur pertinet ad seriem, ad quam refertur & ille a quo, & ille ad quem transilitur; saltum non patrat, qui

qui Tusculo Romam veniens non enecat Imperatorem Turcarum; quia nulla ratio iuteriicit inter duos status Tusculi, & Romæ illam necem. Sed eadem ratione ad statum corporis in orbem acti, & a vi centripeta soluti refertur motus per curvas osculatrices intermedias. Sed demus huiusmodi transitum, esse saltum. Rogo jam num cessatio vis centripetæ, quæ in nostro casu supponitur, fiat tota simul momento temporis, an successive, & per gradus. Si primum ponas, nil mirum si ex hypothese, qua saltum ponis, alius consequitur saltus: si secundum; antequam per rectam tangentem abeat corpus, omnes intermedios curvaturæ gradus attinget.

22. An non melius & illi naturæ legi, & vis inertię indoli consulimus unicam, & quidem a se ipsa non determinabilem in substantiis materialibus vim admittentes? Si vero id ita sit, intelligis rectilineum potius, quam curvilineum, uniformem potius quam acceleratum motum corporis ab actione externa immunis ab ejus natura exigi, & eam naturæ legem non esse arbitrariam, & falsam, demum esse omnia, quæ a principiis superius a nobis refutatis eruit Vir doctus. Nec minus recte consulimus legibus aliis Dinamicæ, quæ a Mathematicis ita efferuntur, ut transitum motus, & vis de una in aliam massam ponere videantur; Quamvis enim ita videatur, ita non est, & verba Mathematicorum referenda sunt admodum, quo res considerant. Ipsi quærunt quantus, & qualis post conflictum futurus sit motus, non vero quomodo conflictus ipse se habeat ad motum subinde consequuturum; an scilicet positivæ instar causæ, an instar rationis mere negativæ.

23. Notione simplicium evoluta, & stabilitis eorum, notis tum positivis, tum negativis locus hic demum postulat, ut de rationis sufficientis principio mentem nostram aperiatur. Illud ergo in primis confidenter effero plane immerito Cl. Virum putare id principium omnino nunquam posse ulli esse usui ad quidpiam utcumque determinandum, & multo minus ad demonstrandum. Amplissimum enim ejus usum uberrime demonstravit Fassonius noster, licet Leibnitianæ scholæ parum amicus, & omnes agnoscunt Leibnitianæ philosophiæ hostes licet infensissimi,

mi, qui ab aliquibus tantum rerum generibus ipsum excludunt, eoque Leibnitianorum instar in ceteris utuntur. Sed mirum non est de ratione sufficiente eum ita sentire, qui confusa satis, & incompleta ejus se notione contentum exhibet, dum conclusiones ab hoc principio deductas refert potius ad ignorationem rationum, quam ad principii vim; dum mere negativum ipsum reputat, & defectui rationis innixa censet ratiocinia, in quibus adhibetur. Falsum enim omnino est ipsum non adhiberi, nisi ad negandam existentiam, cujus ratio ignoretur, vel etiam cujus rationem deesse constet; cum etiam adhibeatur utilissime in investigatione causarum, & rationum eorum, quæ sunt. Falsum etiam priorem illum negativum usum esse nullum usum, cum pro amplissimo haberi debeat. Etiam enim multa, quæ non sunt, revera non esse agnoscere utilissimum est, & necessarium. Mundum ab æterno non esse, athomorum fortuito concursu non esse factum, causarum contingentium infinitum progressum sive, rectilineum, sive circularem non posse dari, & sexcenta alia, quæ passim Leibnitiani ex suo deducunt axioma, metaphysicum, ac Theologum scire decet. Saltum in natura non dari, actionem in distans ab eadem exulare, non fieri in ea per plura, quæ expediri per pauciora queunt, motum non sequi ex actione virium æqualium oppositarum, neutrum bilanciis æquicurræ brachium inclinari, si pondera utrinque æqualia pendeant, quæ facillime fluunt ex hoc axioma, Physicum, & Mechanicum scire oportet. Præterea eadem opera, qua conficitur aliquid non esse, aliud esse detegitur, quotiescumque agitur de existentia alterutrius eorum, quæ simul esse non possunt. Sic evincens mundum ab æterno non esse, ex concursu fortuito causarum non ducere originem, eo ipso existentiam Dei agnoscis; ex quo actio in distans non detur, quia deest ejus ratio, contactum substantiarum admittendum esse intelligis. Sed frustra moror in usu sufficientis rationis, quam præter virum celeberrimum vix reperias alium, qui neget, confirmando; cum præsertim de eo integram instituturi simus dissertationem, qua non solum ab inutilitatis nota, sed a limitationibus etiam illud liberabimus, & errores, qui-

quibus Leibnitius philosophiam inficere conatus est, omnes ex principio hoc latissime sumpto, D. Thoma facem praferente, refutabimus, ut appareat eos non ab hoc, sed ab ejus abusu, vel etiam ex pravo Leibnitii animo ortum ducere; Quod si praestare nobis licuerit, haud erit amplius, quod ab eo principio pertimescamus. Interim observamus ipsum, quamvis ad veritates contingentes referatur, esse necessarium principii contradictionis confectarium; ac propterea contendimus immerito a Cl. Viro falsum etiam existimari.

24. Extensionis realis elementa simplicia esse oportere, unum est eorum, quæ rationis sufficientis principio invictissime demonstrantur, & hanc ob rem ad ipsum confirmandum paulisper digressus sum. Sic se habet illa demonstratio: Siquidem sine ratione sufficiente admitti nihil licet, compositionis utique ratio sufficiens dari debet. Eam autem nondum habes, quandiu compositionem repetis ab elementis compositis, quoniam de ipsorum compositione eadem quæstio excitari potest. Ne igitur abeas in infinitum progressum, a simplicibus tandem primordiis compositionem repetas necessum est. Quodsi in composito etiam solam extensionis rationem spectes, sufficientem rationem extensionis, cui possis acquiescere, non invenies, nisi in initiis inextensis. Imo vi hujus demonstrationis intelligitur primordia ea affectione, ac qualitate carere semper debere, quam in composito consideras, & cujus sufficientem primam rationem quæris. Si in composito respicias figuram, invenies primordia non esse figurata, si divisibilitatem, invenies ea esse indivisibilia. Neque id usuvenit in compositione dumtaxat physica, sed in omni alia. Judicium e. g. est quid compositum; vera ejus, & prima principia non invenies, nisi in ideis; Quod si ejusmodi ideas assignes, quæ judicia involvant, eæ erunt in simplices resolubiles, adeoque non erunt prima judicii elementa. Numerus est aliquid compositum, atque ejus resolutio ultima nonnisi in unitatibus absolvi potest, quibus scilicet ratio numeri non convenit. Sunt qui exemplum a numero desumptum in nos intorquendum putant, quia unitas iterum subdividitur; sed vix audiendi sunt, cum ex defectu ve-

ra



ra idea unitatis philosophantur . Haud enim unitas est ea , quæ in partes dividitur , sed numerus idem scilicet cum partium denominatore ; adeoque quamdiu ea Mathematicorum non sumitur divisibilis , quæstio de vero compositionis numeri principio non absolvitur . Apparet hinc luculenter falsitas principii , quod axiomatis instar usurpari solet , atque ita effertur = Ex inextenso nequit fieri extensum , ex non figurato figuratum &c. = Cum nempe extensum nonnisi ex inextenso , figuratum nonnisi ex non figurato &c. fieri possit , si vere primum , ex quo fit , principium intelligamus .

25. Ceterum quoniam id asperum plerisque nimis videtur , qua fieri potest ratione mitigare conabor : Quamvis elementa extensione careant , inextensa sint , modo tamen suo extensa sunt , continent nimirum ea , per quæ extensionem realem possint efficere , ea , per quæ extensionis elementa haberi debent . Sunt substantiæ reales , ornantur sua vi , propriam exercent existentiam , coexistere unita possunt , sed unum nonnisi extra aliud poni potest . Hæc extensionis ratio sunt , sine his extensio haberi non potest . Hæc ergo , quæ simul extensionis rationem complent , extensionem elementarem , vel initialem dicere potes , atque ita elementa modo suo extensa habebis . Ita vox *inextensum* duos sensus nanciscitur ; vel nimirum ea significatur , quod nec est extensum , nec est quidpiam extensi , vel id , quod extensum quidem non est , sed aliquid extensi est , v. g. extensi principium . Qualitates sunt inextensæ , & nihil extensionis sunt ; nihilum est inextensum , & nihil extensionis est ; sed simplices substantiæ quamvis inextensæ extensionis tamen aliquid continent . Hinc ad extensionem efficiendam diverso plane modo ista se habent . Ex inextensis in primo sensu nequit fieri extensum , quia extensi rationem nullam continent . Ad realem extensionem requiritur , ut ea , ex quibus existit , sint substantiæ , existant , coexistent , se tangant , extraelegant ; quæ omnia a qualitatibus obtineri nequeunt , quæ non existunt , sed inexistunt , se mutuo non tangunt , non extraelegant &c. Pariter nihilum inextensum haud est elementum , ex quo possit oriri extensio . At vero ex

D

in-

inextensis, quæ elementarem illam extensionem involvant, optime extensio oriri potest. Hujus rei exemplum habes ex analysis infinitorum. Differentiale apud analytistas quantitas non est, sed pro nihilo habetur. Quia tamen est aliquid quantitatis, nempe ejus elementum, si integretur, quantitatem efficit; sed ab iisdem nihilum absolutum, uti differentiale quantitatis constantis non integratur; quia nec quantitas est, nec quidpiam quantitatis. Jam tollerabilius admodum esse reor, quod Leibnitiani tradunt, exinextensis actu initiis, sed extensionem aliqua ratione elementi naturæ conformi continentibus extensum exurgere, & intollerabile potius esset id etiam postulare, ut primordia sint extensa eo modo, quo extensa sunt corpora, ut habeant partes extra partes &c. ut sint extensa modo primordii naturæ non conformi. Nam extensio compositi per extensionem eandem elementorum explicaretur, extensionis elementorum ratio adhuc afferenda superesset.

26. Ne autem censeas in eorum sententiam nos descendisse, qui simplicia extensa volunt esse primordia; quia modo suo extensa dixerimus elementa: siquidem nostra hæc extensio veri nominis non est, sed improprie dicta, hi vero proprie dictam extensionem intelligunt; eorum validissimum, quod putant, argumentum hic refutabo. Ita illud se habet = Anima est præsens, & immediate agit in eam cerebri partem, in qua nervorum capita coeunt. Est autem ea pars physicum saltem punctum, adeoque extensum. Anima igitur, quamvis simplex, extensa tamen est. = Admisso influxu physico nihilominus hoc argumenti genere non confici extensa esse simplicia contendo. Simples substantiæ vera puncta physica sunt; horum uni immediate præsens est mens, in ipsum mens, & ipsum in mentem vere agit, ut veri physici influxus idea exigit. Quodsi jam assumatur simplex illud physicum punctum extensum esse, ut inde simplicis animæ extensio inferatur, non simplicium extensio absolute ostenditur, sed in uno simplicium genere assumpta extensione demonstratur extensio in genere alio. Quodsi punctum illud physicum ponatur compositum, quod quidem nonnisi in pseudo influxus systemate fieri potest, & propterea dicatur extensum, tum id supererit de-  
ter-

terminandum ; cur immediata præsentia animæ rei extensæ ejus extensionem , & non immediata præsentia ejusdem rei compositæ ejus etiam compositionem non evincat . Ceterum ex immediata præsentia non eruitur , nisi immediata virium applicatio , quæ mera relatio est ; etsi ea , quæ relationis termino conveniunt , non sunt necessario tribuenda relationis subjecto , optime intelligemus animam referri ad res extensas , compositas , materiales , corruptibiles , quin interim ipsa sit composita , extensa , materialis , corruptibilis . Itaque ex immediata præsentia mentis nihil erui potest , quod simplicium extensioni faveat .

27. Sed independenter a rationis sufficientis principio elementorum simplicitatem demonstramus . Proprie dicta substantia nonnisi simplex aliquid , & inconcretum est ; si enim ens compositum sit , vel ejus partes propriam existentiam exercent , vel aliæ propriam , aliæ non , vel nullæ propriam . Si primum dicas , igitur partes singulæ sunt substantiæ , & congeriem habes substantiarum , non unam , & de his partibus rogari potest an simplices , an compositæ sint . Si secundum malis , & unam partem exercere propriam existentiam , alias impropriam , illa erit substantia , hæ vero affectiones , non veræ partes , adeoque non aliquid compositum , sed simplex habebis , nisi compositum metaphysicum ex subjecto & affectionibus intelligas : Si postremum , substantia erit affectionum , & modorum congeries . Quodsi igitur compositi realis ultima resolutio in veris substantiis terminanda est , ultima elementa necessario erunt simplicia . Neque vero ultima resolutio terminari potest in substantiarum complexibus , quia sic non est ultima resolutio , neque in modis , quia sic mundus esset modorum congeries .

28. Sed jam de modo , quo partes in extensione reali coexistunt , verba faciamus . Atque ejusmodi quidem argumenti genus vir celeberrimus maxima subtilitate , & penitioris physica præsidio ita nuper pertractavit , ut nova , ac ingeniosa ratione modum illum exposuerit , quamvis a Cl. Viris aliis hæc improbata sit . Itaque primum celeberrimi viri sententiam exponam , tamque ab argumentis quidem adversus illam hætenus propo-

tis vindicabo; sed ab ipsa tamen, ea qua par modestia ita recedam, ut postremo tandem loco modum illum postponam, quo primam elementorum unionem peragi, ac verisimilius explicari posse confido.

29. Accipe ergo paucis systema. Ex continuitatis lege ostendit auctor contactum verum, & Mathematicum repugnare. Si enim duorum corporum elasticorum aequalium prima puncta celeritate data ad contactum venirent, eorum punctorum motus simul totus, & per saltum interiret, quod citatae legi repugnat. Ex impossibilitate contactus eruit præter motum nihil aliud reale esse continuum, spatium vero, & tempus esse continua imaginaria. Extensum reale exurgere ex punctis materiae a se intervallo quodam distitis, itaut vacui plus, quam materiae in ipso sit; Puncta præterea materiae singula vi quadam impellente instructa esse debere, ut ab ea velocitas, qua se petunt illa corpora, gradatim perimatur. Reliqua non prosequor, quia ad rem nostram non pertinent. De hac vi repellente unum statim dicam ad objectiones argumenta laudatorum virorum mox transiturus. Arbitror itaque de viri docti sententia ejusmodi vim admitti non opus esse. Vide, quid ipse de Leibnitiano rationis sufficientis principio sentiat. Libera conditoris determinatio potest esse ratio, cur aliquid potius sit, quam non. Hæc nobis plerumque non innotescit. Hinc, ex quo nullam videamus rationem, cur aliquid sit, non sequitur nullam revera dari. Erroris periculo se exponit, ubi de causis etiam necessariis agit, qui a defectu causæ defectum effectus audacter deducit, siquidem paucæ admodum causæ agnoscuntur. Quodsi hæc ita se habeant, vis illa repellens non bene infertur ex contactus veri repugnantia: Nam illatio innititur rationi sufficienti longe diverso in sensu acceptæ. Quia repugnat contactus, opus est ut motus, quo se petunt illa corpora successive minuatur; adeoque opus est, ut detur vis aliqua ipsum gradatim imminuens, & in corpora proinde agens in aliqua distantia. In his sita mihi esse videtur illationis vis. Verum quid? si illa imminutio habeatur ex ignota nobis determinatione conditoris, ex lege ab eo  
lata,

lata, & nobis impervia, ex ignota alia quacumque causa?

30. Hanc ipsam vim ita urget Balassi: si duo corpora mollia sint in limite non cohaesionis alterum citra, alterum ultra asymptotum, id ipsum his evenire debet, quod duobus materiae punctis de mente Auctoris eventurum est; nempe antequam ad asymptotum ipsum deveniant, a vi repellente retrogredi elasticorum instar cogentur. Sed arbitror sententiam bene interpretantem ab hac difficultate eam liberare posse; sed mei id non est instituti.

31. Illam demonstrationem repugnantiae contactus Gerdil in primis ita impugnat: Principium continuitatis aliud non est, quam corollarium principii rationis sufficientis, ac propterea salvum manet quotiescumque sufficiens ratio, cur quidpiam eveniat, non deest. Cur cesset totus illorum punctorum, quae in demonstratione adducuntur, motus ratio sufficiens habetur, scilicet aequalitas motuum, quibus se petunt, & directionum oppositio. Illa igitur motus extinctio saltus naturae non est. Afferit dein contra principium ipsum continuitatis exceptiones, quas in natura sibi observare videtur. His contentus non sum ad eam demonstrationem repudiandam. Si illud in mentem veniat hic agi contra eum, qui ad nihil demonstrandum aptum contendit esse rationis sufficientis principium, non tam libere pro certo assumetur ejus consecutarium esse principium continuitatis; & id sibi negatum iri perspiciet Gerdil: Re enim vera expresse, & disertis verbis adversarius Cl. id negat. Ne apud Leibnitianum quidem ea difficultas vim habet ullam; siquidem minime patietur id sui principii corollarium dici, quod interea verum saltem involvat. Multo minus adversarium deterrebunt quae contra principium continuitatis confert Gerdil, cum de hoc principio profundissime egerit. Adhuc facilius Leibnitianis erit ea respuere, & fallaci continuitatis interpretationi innixa esse ostendere. Neque hac ego in re immorabor, de qua alias acturus sum, interim certum sum iam ex philosophorum consensu hocce continuitatis principium, & naturam deformari non solum cum Leibnitianis dicam, sed cum aliis quoque philosophis, ubi sal-

tus

tus in ea admittantur , & continuïtas ab ea auferatur : Quod cum adversario Gerdilii potius faveat , merito ejus rationibus non acquiesco licet contactum admissurus .

32. Balassus autem eandem demonstrationem sic impetit . Duo illa antica puncta ad contactum prius , quam cetera perventura minime simplicia , & indivisibilia esse possunt , sed , ut contendunt Newtoniani , corpuscula esse debent & compressionis quidem capacia . Ejusmodi tamen non est hæc difficultas , ut demonstrationem supra descriptam labefactare possit . Ejus demonstrationis peracutus auctor simplicia materiæ puncta supponit , & a controversia digreditur , qui hæc impugnare aggreditur ; aliamque suscipit , in qua præter virum doctissimum adversarios habebit & Leibnitianos omnes , & de Schola etiam Newtoniana plurimos , & adversantem offendet rationem ipsam .

33. Quamvis autem hisce rationibus non acquiesco , non propterea demonstrationi subscribo . Ut ratio præcipua , qua moveor , in apicem perducatur , motus notio prius evolvi debet . Motus a Mathematicis consideratur , ut continua , & successiva , loci mutatio , atque in eo distinguuntur directio , spatia , velocitas , tempus &c. a physicis autem spectatur ut actus vis motricis , ad quam ipsum referunt veluti ad suam causam . Hinc naturam , quam a motu universam pendere constat , explicaturi , & phenomenorum rationem allaturi , vires , earumque leges solertissime investigant , a quibus nempe motus repetant , veluti effectus . In motu ergo physice spectato distinguuntur solum diversi modi , quo is massam sollicitat , iique sunt diversæ velocitates physicæ . Ceterum translatio massæ , spatii percursio , directio &c. eo in sensu intellecta , quo a mathematicis sumuntur , sunt extrinsecæ , & accidentales veri , & physici motus affectiones . Eadem enim massæ sollicitatio , idem actus vis motricis , quo massæ transfertur , potest alios producere effectus , qui massæ translatio non sint , v. g. compressionem , tensionem , aut pugnam qualemcumque aliam contra obstaculum ; quod evenire non posset , si massæ translatio ita necessario concipienda esset in motu physico , ut sine ea dari non posset . Hinc fit Mathematicos motum  
ve-

verum, & physicum non definire, dum translationis massæ dumtaxat rationem habent, sed eam solum motus speciem, quæ cum ejusmodi effectus conjungitur; ac proinde fieri utique poterit, ut motus habeatur verus, ubi ex Mathematicorum sensu habebitur quies. Equidem repugnantem hisce experire phantasiâ; sed ea est castiganda, puroque intellectui est indulgendum. Ægre concipies sine directione, sine massæ translatione, & ceteris extraneis affectionibus motum propter consuetudinem hæc completendi in idea motus ex observabilibus motibus exhausta. Sed ne nimium in phantasiâ sæviamus, hæc notas motus realis ideæ adnecti patiemur, dummodo massæ sollicitationem, concitationem, actum vis motricis motum constituere, illa vero motum tantummodo afficere dicamus. Hæc enim motibus observabilibus necessario conveniunt non absolute quidem, sed ex hypothesi, quod aliis coexistunt, ad quæ necessario referuntur, & relationis ordinem mutare possunt; ex quo oritur spatii percursio, & ex hac cetera motus adjuncta intelliguntur. Finge jam corpus, quod moveri observas solum existere ceteris coexistentibus sublati; & ejus massam eodem modo ab intrinseca, & essentiali ipsius vi sollicitari. Ad id certe necessaria non est aliorum coexistentia, neque ex eo, quod illa massa sic sollicitetur, existit alia dari simultanea. Eundem itaque habebis motum, quin mutationem habeas ordinis ad simultanea, quin habeas spatia percursa, siquidem vis motricis actus est idem.

34. Ceterum velocitati, quam ex spatio, & tempore dignoscunt Mathematici aliquid in motu respondet; nimirum modus, quo per eam massa sollicitatur. Cum enim motus omnimode determinari, ac proinde dari non possit, nisi omnimode determinentur ea, quæ ejus notionem absolvunt, sollicitatio massæ ex vis motricis actu proficiscens, quæ innumeris modis determinabilis est, quamdiu motum in genere concipis, & nullo modo determinata, in motu individuo uno debet modo determinari. Ex hoc modo sollicitationis determinatur modus, quo ad simultanea mutatur ordo, seu quo spatia percurreuntur, in quo sita est velocitas in motu vulgo concepta. Hunc ego modum, solli-

sollicitationis posthac *velocitatem intrinsecam*, aut *veram* dicam, at actum vero vis sollicitantem *motum verum*, vel etiam *motus substantiam*. Vides etiam hic fieri illud posse, ut nihil velocitatis habeatur in sensu Mathematicorum, licet vera aliqua velocitas habeatur.

35. Quodsi motus realis probe distinguatur a motu a Mathematicis considerato, argumentum, quo contactus excluditur a natura, solvi posse mihi videtur. Antica scilicet globorum puncta, quæ ad contactum prima deveniunt, per saltum motum minime amittunt, sed successive, & gradatim, quemadmodum successive, & gradatim eundem recuperant intra restitutionis tempus, & motus ipsorum non evanescit, nisi evanescente compressione, & restitutione nascente, siquidem de vero, realique motu sermo sit, non de relationibus ipsi motui extrinsecis. Intelligatur totum compressionis tempus in seriem tempusculorum infinite parvorum resolvi. Primo tempusculo duo illa antica puncta vim suam totam contra se invicem exercebunt, sed hic vis motricis actus, hoc exercitium non sistet amplius eum visibilem effectum, cum quo conjungebatur ante occursum; spatii nempe percursionem, sed alium minus observabilem, scilicet mutuam appressionem. Itaque primo confictus momento nullus supererit motus, cujus mensura petatur a spatiis percursis, sed supererit motus, cujus mensura erit effectus alius minus quidem visibilis, sed a motu vero proficiscens æque ac massæ translatio. Quod si ex hujusmodi punctis tamquam polis infinitos circulos infinite propinquos descriptos supponas, successivis tempusculis eorum peripheriæ ad contactum accedent, & puncta in eis locata vim contra se invicem exercebunt, qua ad se mutuo apprimuntur; atque ita quidem motum, cujus mensuram petas a spatiis percursis, habebunt nullum, verum tamen realemque motum habebunt, cui proportionem respondebunt illæ mutua ad se appressiones. Ceterum quoniam primo tempusculo in confictu jam vis pars aliqua impensa est, secundo tempusculo punctorum anticorum appressio erit minor, & huic secundæ eorum punctorum appressioni æqualis erit appressio prima punctorum in periphæriis ad contactum secundo tempusculo

ve.



venientibus constitutorum. Similiter tertio tempusculo ad contactum venient puncta locata in circulis ad contactum venientibus, & eorum appressio ob eandem rationem erit minor, sed æqualis appressioni tertiæ punctorum anticorum, & secundæ punctorum, quæ secundo tempusculo ad contactum venere. Eodem pacto ostenditur puncta locata in circulis quarto tempusculo ad se accedentibus minorem adhuc appressionem mutuam efficere, quæ æqualis est appressioni quartæ primorum, tertiæ secundorum, secundæ tertiorum. Et in genere pressio prima tempusculi sequentis, æquatur pressioni secundæ punctorum circuli, qui momento præcedenti, tertiæ eorum, quæ alio antecedenti adhuc momento venere ad contractum, & sic porro.

36. Itaque in huiusmodi corporum occurſu tantum abest, ut motus datus in instanti pereat, ut potius pulcherrimas series, quæ successivam ejus diminutionem gradatim exponunt, contemplari in eo non sine jucunditate possimus. Puncta in primis, quæ ultimo compressionis tempusculo veniunt ad contactum, toto compressionis tempore ad se accedunt motu successive magis retardato, & quidem ejusmodi, ut ejus mensuram petere debeas a spatiis successive percursis. Horum motus per seriem continuam decrementorum evanescit, quemadmodum spatia ipsa percursa. Puncta circulatorum penultimo momento se contingentium similem motum retardatum, cujus mensuram petere possis a spatiis, exercent usque ad penultimum tempusculum, a quo usque ad finem compressionis eorum motus in compressione impenditur. Idem evenit circulatorum subsequens punctis. Habes ergo tot series motuum gradatim decreſcentium, quot puncta ad contactum venire ponis. Quodsi ab anticis exordium ducas, habebis tot series motuum successive imminutorum, quot puncta, ita tamen ut motus successivi punctorum anticorum exhibeantur per appressionis gradus; punctorum secundi tempusculi motus per appressionis gradus exponatur a secundo tempusculo ad finem compressionis; idemque de ceteris punctis dicendum sit. Aliam seriem depræhendes, si consideres primam appressionem, quam singuli punctorum ordines exercent; ea enim est maxima in anticis,

E

ticis,

ticis, minor, ut vidimus, in secundo ordine, adhuc minor in tertio, & sic porro, donec in ultimo ordine evanescat; imo seriem decrecentem invenies semper, si quascumque appressiones homologas, seu iisdem exercitas temporibus, inter se compares. Series etiam, sed continuo crescentes invenies, si puncta ad contactum successive venientia enumeres. Quid plura? Tantum abest, ut admissio contactu saltus induci in naturam debeat, ut potius naturæ continuas vix se alibi melius, quam in occursum illorum globorum agnoscendam in seriebus decrementorum, & incrementorum præbeat.

37. Lubet exemplo illustrare, quæ diximus. Corpus dati ponderis perfecte durum super aliud incumbat perfecte durum; funis per trocleam trajectus altero extremo illud corpus, & altero æquipondium sustineat. Corpus jam superius minime premet inferius. Auferantur jam ex æquipondio successive ponderis particulae, & corpus superius exeret in comprimendo inferiori vires particulis ablatis proportionales, &, cum actus vis motricis sit motus, movebitur, quin spatia percurrat, & hujus proinde motus mensura non a spatiis, sed a pressionibus petenda erit. Quemadmodum pressionibus hæ ab initio crescent, dum successive pondus particulae ab æquipondio auferuntur, & decrecent, dum ei redduntur, ita a principio restitutionis ad ultimum usque tempusculum crescent appressiones punctorum in globis earatione, qua ab initio conflictus ad ultimum usque compressionis momentum decrevere. Haud vereor ne hypothelin corporum perfecte durorum fastidias, tum quod exempli loco, & illustrationis causa allata sit; tum quod ea substituantur punctis compressionis minime capacibus, simplicibus, inextensis, quæ respectu compressionis pro perfecte duris merito habentur.

38. Quod si igitur punctorum non solum anticorum motus, non per saltum interit, sed successive, sed nec etiam ceterorum, ita ut, cui volupe fuerit, infinitas possit contemplari series, in quibus modus, & ordo imminutionis motus toto compressionis corporum tempore, elegantissimus, atque admirabilis elucet, globos ad contactum venire posse, quin continuitatis prin-

principium lædatur; quin saltus in natura admittatur, merito contendimus. Et cum repulsivæ vis existentia ex repugnantia contactus inferatur, eam etiam jure repudiamus.

39. At licet non intereat per saltum, inquires, motus, quatenus est vis motricis exercitium, totus tamen in anticis eorum globorum punctis momento perit motus, quatenus est massæ translationis. Cum primum publice tradidi meam hanc solutionem argumenti, quo repugnantia contactus adstruitur, exceptionem, hanc mihi proposui, quam hic etiam adjicio, & solvo, quia ab ipso sententiæ nobis adversæ auctore acutissimo memini eam mihi oppositam fuisse. Accipe itaque paucis solutionem. Præter actum vis motricis massam dato modo sollicitantem quidquam aliud reale in motu non habetur; quamdiu datur hujusmodi sollicitatio, datur realis motus; cum translatione massæ, cum pressione, cum tensione nonnisi contingenter ipse conjungitur; & propterea quod aliquid horum in motu esse desinit, non desinit ipse motus; desinit solum ratio petendi ab eo motus mensuram. Ratio hæc ad motum ipsum non spectat, siquidem is non, ut in spatiis percursis potius, quam in aliis effectibus mensura ejus assignetur, requirit, sed indifferens est ad quamvis mensuram; sed potius pertinet ad mentem ex consuetudine in ejus ideam spatia percursa intrudentem. Ex quo vides non desinere per saltum aliquid in regno naturæ, ubi desinit motus ad spatia percursa, relatus, sed solum aliquid in regno imaginationis. Profecto vix invenias inter philosophos, qui, quemadmodum naturam, in qua ab auctore sapienter omnia reguntur, ita imaginationem a saltu defendat. Similiter ex eo quod puncta globorum antica, ubi ad contactum venere, spatium percurrere desinant, intelligitur cessare, non motus, sed ipsius relatio ad spatium; ergo non cessat aliquid reale, siquidem relationes entia realia minime sunt; præsertim ubi concipiuntur seorsim a rebus ipsis, uti in nostro casu fit. Quis dicat aliquid reale interire in patre, cui filius emoriatur? in numero X, quia ceteri sublatis supponuntur, ad quos secundum æqualitatem, vel inæqualitatem referebatur? Quid? Quod ne ipsa quidem spatia, quæ desinunt percurrì, realia sunt.

Delinunt ea puncta percurrere spatium, quod inter ipsa interjiciatur, quod nullum est ex hypothefi.

40. Ex inductione contactus repugnantiam eruere conantur alii. Interruptiones apparent inter partes cujusvis etiam densissimi corporis, ajunt, inter partes partium per microscopium etiam depræhenduntur, & adhuc inter partes tertii, quartique ordinis per microscopia optima. Inter ipsa autem primordia, quæ certe oculis quovis microscopio instructis non subjiciuntur, interruptiones admitti debere, suadet analogia. Verum hoc argumenti genus contactum ab elementis non satis excludit, tum quia immediata observatio, cui innititur, ea non est, quæ describitur, tum quoniam principium petit. Ad primum quod attinet, non inficior interruptiones, rimas, poros inter corporum partes depræhendendi, sed constanter pernego ullam apparere a ceteris plane sejunctam, itaut veluti quædam insula a ceteris sit plane sejuncta, atque divisa. Argumento igitur ad primordia usque traducto conficiemus potius ea inter se ita connecti, ut spatia relinquunt vacua, quod salvo contactu fieri potest, si in perimetris linearum concurrentium, vel in se redeuntium constituta intelligantur, sed non ea se nullo pacto contingere; aliquas eorum series ultra cetera exporrigi instar peninsularum, sed non penitus separari. Quod vero spectat ad secundum, cum interruptiones sint tantum apparentes in sententia eorum, qui contactum verum tuentes vacua omnia intervalla opplent fluxili materia, cujus subtilitas, & resistentia levissima eam percepit sensu non sinunt, nisi obscurissime, utique assumitur, quod adversarii negant, quodque controversiam constituit, si assumitur illas veras esse interruptiones. Profecto illæ interruptiones aliud non sunt, quam materia descripta confuse percepta, & pro materia non habita, quia notæ in materia sensibili notabiliores in ea non elucent. Sed argumenta a perceptionum confusione rerum non existentiam rite non deducunt.

41. Præcipuis rationibus contactum rerum oppugnantibus satis, ni fallor, refutatis, superest, ut aliud solvam argumentum, quo simplicium contactus possibilitas ipsa petitur, dissolvam;

vam; nimirum vetustissimum illud, quo olim Zeno urgebatur; sophisma, cui tanta vis a viro doctissimo tribuitur, ut absolutissimæ demonstrationis nomen ei concedere non dubitet. Argumentum hoc est. Aut simplicia se contingunt in toto, aut se non contingunt; si alterum dicas, ergo se compenetrant, inferunt, & in unum coalescunt; concipi enim nequit, ajunt, punctum puncto contiguum, & interim unum extra aliud positum. Superest ergo, ut dicas ea se non contingere, quippe cum quoad partem se contingere nequeant, quia partibus carent. Ego vero imaginationis erroribus ipsum accenseo. Si enim idearum nostrarum originem alius penetremus, non adeo confidenter asseremus concipi non posse duo simplicia se in toto contingere, quin in unum coeant; sed phantasiam ab intellectu distinguentes, ea, quæ subjiciuntur phantasiæ ab iis, quæ puro intellectui subsunt, in judicio de contactu simplicium efformando non inferiorem illam facultatem, sed hanc superiorem audiendam esse intelligemus. Quamvis igitur contactum nullum ex iis, quæ sensu, & imaginatione comprehenduntur, inveniamus, qui res in toto uniat, non asserendum ideo hujusmodi contactum omnino fieri non posse in ullo rerum genere, ne judicium imaginationis extendamus ad ea, quæ subiecta ipsi non sunt: quamvis imaginatio hujusmodi contactum non concipiat, non absolute statuendum concipi eum non posse, ne aliam facultatem parem comprehendendis iis, quibus assequendis par non est phantasia, menti denegare videamur.

42. Si animo tranquillo nullius aut proprii, aut a magno philosopho aliquo adoptati systematis amore occupato purum intellectum, qui vera est hac in re facultas adhibenda, ad contactum simplicium repræsentandum applicemus, non certe eum sine coalescentia in unum concipi non posse, sed citra coalescentiam in unum concipi debere intelligemus. Sensus, & imaginatio nedum simplicia non attingunt, ne composita quidem omnia. Dantur innumeræ res adeo exiles, & hujusmodi rerum etiam plures dantur ordines, uti selectis physicæ observationibus Psychologia demonstrat, ut extra harum potentiarum campum consti-  
tuan-

tuantur. Hæc nimirum est inferioris cognoscendi partis conditio, ut non extendatur, nisi ad quædam objecta, quæ ad sensuum instrumenta quandam habeant rationem. Hæc augeri duplici ratione potest; objecta scilicet augendo, vel sensuum tenuitatem imminuendo; contrario autem modo imminuitur, ut ipsis magnitudinum rationibus usuvenit. Idem corpus, quod pro ratione, quam habet ad nostrum corpus, iustæ habetur magnitudinis, parvum videretur, si majori, minimum, si maximo corpore instrueremur; ejus pondus, quod mediocre judicabitur, dum manus ipsum sustentans vi ordinaria pollebit, gravissimum judicabitur, ubi manus ipsum sustentans vi tenuissima instructa fuerit; durum vocabitur, quamdiu premetur vi, qua in statu suo pollet manus, sed molle videretur, si Gigantum vis manibus nostris inesset; & quod morbidum est tactu nostro, asperinum esset, si araneorum tactui similis esset tactus noster, partes illæ ejusdem corporis, quæ minimæ a nobis dicuntur, quia minores a nobis oculo non discernuntur, non amplius minimæ dicerentur, si oculis linceis instrueremur; qualitatum differentiarum, & gradus incrementa, decrementa frigoris, caloris &c. quæ levissima, aut fere nulla videntur, maxima existimarentur, ubi ad hujusmodi qualitates sentiendas aptitudo nostra augeretur; atque hæc quidem discrimina inter judicia, quæ de rebus efformantur sensibus nostris in alios permutatis, imo etiam inter illa, quæ revera de rebus iisdem a nobis efformantur sensibus nostris diversimode affectis, & constitutis, debentur variationi rationis illius determinatæ, quam objecta ad sensus habere debent, ut horum sphaera activitatis illa comprehendat. Hanc autem rationem ad eos cum non habeant res simplices, imo ne compositæ quidem omnes, in eorum sphaera minime continentur. Ex quibus compertum fit non immerito sensus, & phantasiâ nolle nos esse judices in causa contactus simplicium, & merito nos postulare, ut ad puræ rationis tribunal causa hæc deferatur.

43. Ea, quorum contactum sensu percipimus, haud se tota contingunt, sed quoad partes, & extra se invicem existunt, in unum non coalescunt, non compenetrantur. Si hæc duo, scilicet

cet non in toto contingi, & non coalescere in unum, a se pendeant, ut unum alterius ratio sit, minime haberi contactus poterit, quin simul habeantur; sin secus, contactus haberi poterit, in quo duorum unum locum habeat, quin simul in eodem locum habeat alterum, in quo scilicet unius extra aliud existentia, non coalescentia in unum, non compenetratio habeatur, quin simul habeatur contactus solummodo quoad partem, non in toto. Itaque ad concipiendum contactum simplicium, qui in argumento anti-Zenonico prædicatur inconceptibilis, majori opus non est mentis nisu, quam ad concipiendum hoc Ontologiæ principium = Eorum, quæ a se invicem non dependent, vel quorum unum alterius ratio non est, unum dari potest, quin simul alterum detur. Quis vero illa duo a se pendere affirmabit? Quis rationem, quare se non compenentrent corpora ad contactum, venientia, petet ex eo, quod non in toto, sed in parte dumtaxat se contingant.

44. Siquidem in hac independentia earum duarum contactus corporum proprietatum vim maximam habere mihi videtur, ad eam fortius statuendam me convertam; dumque adducam ea, a quibus illæ proprietates vere pendent, eo ipso conficiam earum alteram alterius rationem non esse. Corpora ergo quoad partem, & non in toto se contingunt, quia composita sunt, & ex partibus extra se invicem diverso ordine constitutis coalescunt; se vero contingunt citra compenetrationem, quia sunt substantiæ; quarum essentiæ repugnat compenetratio. Porro hæ duæ rationes a se invicem non pendent, imo plane disparatæ sunt; neque enim corpus est ens compositum, & partes habet, quia substantiæ sunt impenetrabiles, neque impenetrabiles sunt substantiæ, quia corpus partibus constat. Equidem ut corpus fiat, ut existat, debet impenetrabilitas dari in initiis ipsum composituris, fateor, sed non ea propter corpus per essentiam & naturam est ens compositum dependenter ab illa impenetrabilitate, a qua solum quoad existentiam pendet, ut levi attentione utens metaphysicus facile largietur.

45. In nullo corporum contactu, inquires, una ex iis propri-

prietatibus habetur, quin simul altera habeatur, adeoque una ab alia numquam dividitur, utievenit iis, quorum unum ab alio determinatur. Sed præter quam quod discrimen interest inter hæc duas propositiones = Quæ se determinant, ea simul ponuntur = & = quæ simul ponuntur, ea se mutuo determinant = itaut ad secundæ veritatem restrictione opus sit; alias mors cæsaris esset ratio, quare obscuratus sit sol: falsum est in omni contactu illa duo simul haberi, cum in contactu simplicium unum eorum adesse, & alterum abesse contendamus, nec oppositum, sine probatione possis assumere.

Bene intelligo, inquires etiam, ex eo quod partes quædam ad contactum non veniant, corpora, quæ se contingunt, non compenetrari, & ex eo quod se non compenentrent, corpora se in quibusdam tantum, & non in omnibus partibus contingere. Finge ergo, regeo, qui ita intelligis, vel per annihilationum a Deo faciendam, vel alio quovis modo demi a corporibus se contingentibus illas omnes partes, in quibus se non contingunt. Quodsi ratio, quare se non compenentrent petenda est inde, ut dicis, quod quibusdam in partibus se non contingant, hisce sublatis, residuæ se mutuo compenetrabunt. Neque enim residuæ in parte dumtaxat se contingent, alias demptæ non essent omnes, quæ ad contactum non venere. Similiter ratio, quare corpora non se in toto contingant inde peti non debet, quod compenetrari nequeant; siquidem partes alias, quæ in contactu non sunt, ad contactum adduci non repugnat mutato solum earum ordine, ceteris, quæ jam se contingebant, & se non compenetrabant, statum suum tuentibus. Neque vero ex mutatione ordinis partium se non contingentium, ad eas, quæ se jam contingunt, sit hæc, quæ se antea non compenetrabant, se nunc compenetrare. Sed hæc fictio, regeres adhuc, qua remouentur, vel annihilari ponuntur partes omnes, quæ se non contingunt, vel mutato ordine ad contactum transferri excedit vim mentis, nullamque, nisi inanem, relinquit contactus ideam. Admittam id utique, si vocabulum *mens* non aliud exponat, quam sensum, & phanthasiam, quia idea, quæ



quæ exoritur, ejusmodi est, ut a sensu, ac phantasia recognosci nec possit, nec debeat: Ex quo illud existit, quod ipsos rerum compositarum, & observabilium contactus infeliciter representat inferior cognoscendi facultas, atque propterea hujus facultatis judicio in re nostra vix quidquam deferri debet.

46. Notio igitur contactus rerum compositarum duas illas notas involvit quidem, sed non mutuam earum notarum dependentiam, itaut una ei conveniat necessario, quia convenit alia; imo si eum contactum pura ratione concipiamus, ab ejus idea earum notarum unam excludere non repugnabit. Hanc vero ab idea contactus simplicium excludi necessum est. En modum, quo ejus contactus ideam efformat ratio: Substantiæ simplices sunt substantiæ: ergo compenetrari nullo modo possunt. Substantiæ simplices sunt simplices, carent partibus, ergo non quoad partem, sed quoad totum se contingunt. Qui vim horum argumentorum percipit, is ideam contactus simplicium eam nanciscitur, quæ ambas illas contactus compositorum notas non continet, sed earum unam potius necessario respuit. Neque potest eorum vim quispiam non sentire, cum constet apertissime & partibus carere simplicia, & impenetrabilitate donari, nec eorum simplicitatem sine partium absentia, nec eorum realitatem sine impenetrabilitate concipi posse; atque uti primordia simul sunt simplicia, & simul reales substantiæ, ita simul & carere partibus, & penetrationi obistere; & propterea eorum contactum concipi debere sine compenetratione, atque coalescentia in unum; licet interim se quoad tota contingant; ita quidem, ut si ex contactu simplicium quoad tota inferas eorum coitum in unum, simplicitatis ideam retineas, & deseras ideam realitatis; si contra ex impenetrabilitate neges contactum eorum quoad tota, a realitate disjungas simplicitatem. Quamobrem aut pura ratio ejusmodi est, ut ens nequeat concipere simul simplex, & reale, seu substantiale, aut contactum simplicium nequit concipere nisi & quoad tota simul, & citra penetrationem; atque ita non repugnat hujusmodi initiorum contactus, uti ens, quod

L. . . .

F

fit

fit substantia, & simul sit simplex, nullam præferret repugnantiam. Liquet igitur absolutissimam demonstrationem minime esse argumentum, quod a punctis Zenonicis ad vera primordia rerum transfertur; sed solum videri, quamdiu phantasia rationis jura usurpet, deque rebus ei minime subjectis judicare audeat.

47. Profecto quemadmodum in aliis bene multis, in hac etiam re illud evenit, ut eam esse debere intelligamus, modumque interea, quo ipsa sit, & fiat, distincte explicare nequeamus. Quodsi hac de causa aliquis neget certo affirmari posse rem esse, simplicia se tota tangere, & simul in unum non coire; plurima, quæ pro certissimis ipse habet, ne ipse certo asseveret esse, impediam v. g. dari curvarum asymptotos, Logisticum spatium esse æquale rectangulo dato; animam humanam existere, existere Deum, omnia ab eo ex nihilo fuisse creata, alia sexcenta. Quodsi ab ignoratione modi, quo res aliqua sit, vel fiat, eam non esse, vel fieri inferri non debet, nullius erunt momenti illæ omnes difficultates, quæ modum hunc concepturo se objicient. Lubet tamen quibusdam gravioribus, & magis obviis occurrere. Dum simplex unum a pluribus undequaque tangi concipere volumus, vim menti inferimus, si negamus in eo tot diversas facies, quot sunt plagæ, ex quibus ad illud tangendum alia simplicia venire. Nempe si simplex in centro spheræ constituitur, & undequaque a simplicibus tangatur, quæ a superficie spheræ in illud irruerint, opus omnino erit, ut simplicia a diversis superficiei punctis venientia simplicis centralis diversas facies tangant. Sed quam tandem ratione fiet, ut illud simplex diversas habeat facies, quin interim partes habeat? Neque dicendum ab omnibus illud eadem in facie tangi; Alias simplicia circum constituta se etiam contingentia qua facie contingunt simplex centrale, eadem contingerent se se, atque ita inter ea simplex centrale non esset. Hæc utique se sistunt imaginationi, dum contactum sibi repræsentare conatur. Quamobrem vis menti non infertur, sed phantasia coeretur; dum ex  
idea

idea contactus illæ facies diversis plagis obversæ excluduntur. Si nempe phantasia suos maneat intra limites, & liberum, integrumque relinquat, uti fas est, de simplicibus iudicium, hæc monstra evanescent; uti videbis ex his, quæ de contactu prædicat ratio. Contactus aliud non est, quam immediata virium applicatio; & cum substantiarum ad essentialiam vires pertineant, seu substantiæ per essentialiam sint activæ, sint vires, præter hanc virium applicationem aliud non concipies in contactu, nisi extranea in ejus ideam velis intrudere. Quæ vero in vi cujuslibet substantiæ concipi possunt, sunt diversæ ejus determinationes, scilicet diversæ directiones, diversi velocitatis gradus. Si ergo ex sphaeræ superficie in simplicem substantiam centrum occupantem irruant simplicia, illa sua essentiali impenetrabilitatis vi se tuebitur, ab hujusmodi incursu quaquaversum, & secundum omnes directiones, per quas contactus singularum inter se discernes rectius, quam per illas imaginarias quocumque obversas facies. Ita omnes circumquaque constitutæ substantiæ tangent totam, quæ locatur in centro, quia omnibus ea applicant vim suam, sed non omnes tangent eodem modo, quia non in omnes eadem ratione, & secundum eandem directionem vis illa exercetur; inter omnes circumundique locabitur substantia centralis, quia dabitur semper ea, quam contingunt aliter, ac se contingant, dabitur semper ea, quæ ipsis opponet vim suam diverso modo, ac ea vim sibi opponunt. Levissima autem sunt ea, quibus hæc urgeri solent; scilicet in simplici admittendas non esse vires oppositas; si functiones illæ diversæ, ac distinctæ sint reales, simplex non carere distinctis realitatibus, si reales non sint, vel non sint distinctæ, aut imaginariam, & chimæricam esse distinctionem contactuum substantiarum circumpositarum, aut nullam: Levissima, inquam; quia non admittuntur in eodem simplici oppositæ vires, cum unica vi ita a Leibnitianis oriantur substantiæ, ut iis multiplicatis multiplicari etiam substantias velint, sed oppositæ tantum directiones, quæ a diversis modis, quibus vis eadem determinatur, proficiuntur. Vim autem unam re-

late ad res diversas, vel oppositas diversis, vel oppositis modis determinari non repugnat; fieri utique potest, ut vis volendi simul ad volendum, & nolendum determinetur, dummodo diversis, vel oppositis res eidem obijciantur, ut intellectus sciat, & ignoret, si de diversis rebus sermo sit. Aliud est autem habere vim diversis, & oppositis modis determinatam, aliud habere plures, & oppositas vires. Sed nec diversis simul determinatur modis vis illa unica substantiarum. Illæ enim directiones omnes simul sumptæ complent unicam omnimodam ejus determinationem. Ceterum hujusmodi directiones aliud non sunt, quam diversæ illius unice vis substantiæ centralis ad vires substantiarum ambientium relationes. Levissima, inquam, quia hæ directiones, hæ functiones diversæ ejusdem vis sunt reales utique, sed reales modi, non reales substantiæ, & simplici multitudo quidem partium substantialium, non vero multitudo affectionum, modorum, relationum repugnat. Modorum realitas pendet a realitate subjecti, a quo si mens eos dividat præcindendo, realitas ipsorum evanescit.

48. Vindicato jam contactu & ab iis, quæ ejus existentiam, & ab iis, quæ ejus possibilitatem feriunt, superest ut positivas efferam rationes, quibus eum in natura necessario dari faciam. Certe si contactum a natura prorsus determinemus, necesse erit ut actioni in distans locum in ea concedamus, & substantiæ propterea agent, ubi non erunt. Id vero non est unum ex iis, quæ imaginationis vim tantum excedunt, & ab intellectu comprehenduntur, cujusmodi plura ex iis, quæ supra attulimus, esse fatebamur, sed nec phantasia, nec ratio id assequi potest. Actio enim sine vi non intelligitur, & vis a suo subjecto, a sua substantia separari nequit, siquidem ea affectio est propriæ existentiae incapax, & inexistentiæ solum capax. Actio tum demum haberi intelligitur, quando substantia una impingit in aliam, quando aliam contingit, quando ei alia se opponit; nec intelligi potest, nisi agenti quidpiam opponatur. Sed frustra moror in ostendendo principio, quod axiomatis instar assumitur

mitur communiter; quodque vix inter philosophos invenias, qui in dubium vocaverit. Quamvis enim de Newtonianis aliqui nesciri, an dari actio in distans queat, asseruerint, & in possibilitium investigationem studium conferre recusaverint, subinde tamen aliam amplexi sunt sententiam, qua actionem in distans declinant, attractionem minime inter actiones, sed potius inter arbitrarias Dei leges recensentes. Quæ quidem opinio postmodum arrisit aliis, qui eam etiam ampliarunt vim quoque inertiae sub ea comprehendentes. Cum autem veræ actioni vix, aut ne vix quidem ea locum in natura relinquat, ad Malebranchianismum quam proxime accedat, quis non intelligit? Agedum eam quoque, si fieri potest, evellamus.

Ad eam sententiam duæ mihi videntur trahere rationes; nempe necessitas vacui, & repugnantia contactus. Primam hic non excutiam, quippeque nimis amplam dicendi materiam supeditat, de ea in disertatione de resistantia mediæ verba factururus, de secunda tantum hic agam paucis. Contactum minime repugnare, quæ ejus existentiam petunt, rationes non satis esse validas, jam demonstratum est. Cum vero philosophus ad causam primam tum deum ascendere solum debeat, cum de effectibus agitur, quos a causis secundis repetere non liceat, nisi occultas peripateticorum qualitates felicissime a philosophia exterminatas revocare cordi sit, mutationes, quæ in substantiis producantur, per Dei voluntatem explicare non debet, siquidem in substantiarum viribus, & in immediata earum applicatione invenimus earum plenam, & ab omni tum possibilitatis, tum existentia repugnantia immunem. Hæc præcipuum illius opinionis fundamentum evertere mihi videntur.

49. Constat igitur & simplicia esse realis extensionis primordia, & ad eam efficiendam ea ita simul conjungi, ut vires immediate sibi applicant suas, ut se immediate contingant. Duo hæc in extensione concipiamus oportet, & initiorum simplicitatem, & contactum: Si illam demas, extensionis idea involvet notas in extensionem resolvendas; si demas hunc, exten-

sio-

sionem non concipis. Si enim concipis initia a se divisa, & spatium inter ipsa, aut hoc spatium reale est, & tum in primordia simplicia se contingentia solvi debet, aut reale non est, & extensionem nullam concipis veram, nam elementa a se divisa, extensionem non efficiunt; vera, & realis extensio nequit esse illa spatii non realis, & primordia divisa una cum distantibus imaginariis extensionem realem non efficiunt. Quis enim putet exurgere reale ens ex rebus partim realibus, partim imaginariis?

50. Investigandum hic esset an extensionis inter notas essentialiales ponenda sit etiam continuitas. Sed cum continuitatis notio evolutione admodum indigeat, ut celerius dicendi finem faciamus, alias ea de re nobis erit sermo. Ceterum vi eorum, quæ jam dicta a nobis sunt, si constare nobis velimus, continuitatem in idea extensionis a nobis esse includendam jam hic fateor. Hæc itaque realis extensionis est vera notio.

*Extensio est substantiarum simplicium ejusmodi unio, & una alteri immediate adjaceat.*

51. Ex substantiarum simplicium materialium diversis generibus; (siquidem inter omnes discrimen aliquod intercedit), & ex diversis modis unionis exurgunt diversæ extensionis species. Haud tamen licet nobis descendere ad explicandum individuum modum, quo primordia in auro, argento, & aliis hujusmodi extensis, vel ad assignandas notas, quæ in elementis ea componentibus esse debent. Hæc vim mentis nostræ superant. Ceterum cavendum ne ignoratio essentialium individuarum plus æquo extendatur, itaut essentialiæ quoque universales, & abstractæ eidem subjiçantur. Id non observantes aliqui philosophi ignorantie essentialium confessione ad manifestissimas veritates in dubium vocandas abusi sunt. Sic ad excludenda simplicia elementa, ad eludendam argumenti Leibnitiani vim ex Newtonianis multi se compositionis rationem sufficientem allaturos dicebant, postquam Leibnitianus corporis alicujus essentialiam recte definiverit; perinde ac si ad agnoscendam corporis in genere essentialiam

ne-

necessaria foret essentia auri ; argenti &c. cognitio.

Sed Deus , inquiunt , immediate præsens est rebus omnibus , non quidem virtute solum , sed etiam substantia . Id autem intelligi certe nequit , nisi substantia divina immense extensa dicatur . Adeoque admitti debet extensionis quoddam genus , cujus essentia , & natura ignoratur . Per extensionem ergo intelligunt immediatam rebus pluribus simul existentibus , & extra-existentibus præsentiam . Hæc vero extensio non est , & improprie extensio dicitur . Deus enim rebus immediate præsens est , quia res immediate conservat , quia rebus immediate applicat vim suam ; omnipræsencia igitur Dei importat immediatam divinæ a divina substantia non destitutæ virtutis applicationem ad rerum existentiam tuendam ; talem scilicet relationem , per quam rerum perduratio Deo adscribitur . Necessum vero non est , ut quod ad plura refertur , extensum sit , ut extensum sit , quod refertur ad extensum ; in genere opus non est ut ea , quæ relationis termino conveniunt , conveniant quoque subjecto . Sic Deus æternus ad res non æternas , infinitus ad finitas , immutabilis ad mutabiles &c. refertur . Quidni ergo etiam inextensus referri non poterit ad res extensas ? Si ita explicamus omnipræsentiam , per hanc Deum non evadere compositum , non evadere divisibilem &c. intelligemus ; si vero Dei substantiam per omnia diffusam , & mundo coextensam dicimus , non possibiles solum , sed actuales quoque partes in ea designabimus , atque ita compositum , ac divisibilem Deum efficiemus .

Uti se habet æternitas ad tempus , ita immensitas ad extensionem , vel spatium . Sed æternitas non est infinitum tempus ; siquidem non est infinita series successionum , sed omnem successionem excludit ; ergo nec immensitas dici debet infinita extensio ; & quemadmodum dici non debet Deus infinite temporaneus per æternitatem ; ita nec infinite extensus dicendus est per immensitatem : Dei æternitas subjective considerata est ipsa existentia Dei necessitas , & hujus necessitatis notio longe differt a notione temporis infiniti : Dei immensitas est divina  
vir-

virtus infinita ; & ejus conceptus longe etiam multumque differt a conceptu infinitæ extensionis . Deferant ergo tandem luxuriantis Phantasia Newtoni figmenta , & rectius , ac decentius de Deo loquentur .

F I N I S :